

Pengelasan zon kurangkan kelunturan karang

UM 4/9/2024 pg 34

KUALA TERENGGANU: Jabatan Pelancongan Negeri Terengganu akan melakukan pengelasan zon di lokasi terumbu karang bagi meminimumkan kesan kelunturan karang yang berlaku di perairan Malaysia ketika ini.

Pengarahnya, Ahmad Ridzwan Abd. Rahman berkata, pihaknya akan mengadakan perbincangan dengan Universiti Malaysia Terengganu (UMT) untuk mendapatkan penjelasan lebih terperinci.

Menurutnya, kelunturan karang berskala besar yang kini berlaku di perairan negara berpunca daripada pemanasan global namun faktor aktiviti manusia turut memberi kesan terhadap perkara itu.

"Terengganu memang agak terjejas terutama di sekitar Pulau Redang yang terkenal de-

ngan keindahan terumbu karang di dasar laut.

"Namun, bagi kawasan yang kurang tumpuan aktiviti manusia seperti di Pulau Tenggol di daerah Dungun, kadar kelunturan karang tidak begitu teruk dan masih terpelihara.

"Satu langkah proaktif akan diambil termasuk berbincang dengan penggiat industri pelancongan terutama di pulau-pulau peranginan Terengganu dalam masa terdekat," katanya ketika ditemui *Utusan Malaysia*, di sini, semalam.

Baru-baru ini, akhbar melaporkan terumbu karang di Malaysia mengalami isu kelunturan besar-besaran akibat peningkatan suhu permukaan laut yang boleh memberi implikasi serius terhadap biodiversiti marin, perikanan terumbu karang dan pelancongan.



KELUNTURAN terumbu karang berskala besar dilaporkan berlaku di perairan negara.